

03 NOV 2000

Mahathir-Kongres

DR MAHATHIR KECAM ANGGOTA KONGRES AMERIKA

KUALA LUMPUR, 3 Nov (Bernama) -- Perdana Menteri Datuk Seri Dr Mahathir Mohamad berkata anggota Kongres Amerika Syarikat yang mengemukakan resolusi supaya Datuk Seri Anwar Ibrahim dibicarakan semula, tidak memahami peraturan undang-undang.

"Pada saya nampaknya mereka tidak faham apa yang betul dan apa yang salah. Sebenarnya orang-orang ini tidak harus menjadi anggota kongres... mereka tidak layak jadi anggota kongres di negara yang paling berkuasa di dunia itu.

"Jika inilah jenis anggota kongres yang mereka ada, saya rasa sedih dengan mereka," kata beliau ketika diminta mengulas resolusi yang dikemukakan oleh anggota kongres AS pada 27 Okt yang menggesa kerajaan Malaysia menggugurkan semua tuduhan terhadap Anwar dan mengadakan perbicaraan semula.

Presiden Parti Keadilan Nasional Datin Seri Dr Wan Azizah Wan Ismail semalam mengakui bahawa satu pergerakan yang diketuai seorang pembantunya sedang berusaha melobi anggota kongres untuk mengemukakan resolusi itu.

Dr Mahathir yang bercakap kepada pemberita selepas melancarkan sambutan Jubli Emas RIDA-MARA di Pusat Dagangan Dunia Putra, berkata peraturan undang-undang tidak membenarkan Perdana Menteri atau kerajaan mengarahkan perbicaraan semula.

"Kalau dia nak perbicaraan semula, dia carilah dalam undang-undang kita bila perbicaraan semula dibenarkan," katanya.

Perdana Menteri berkata jika beliau mengarahkan diadakan perbicaraan semula, maka ia bermakna beliau tidak mempunyai keyakinan terhadap hakim-hakim dan terpaksa memecat mereka.

Beliau berkata Malaysia tidak ambil kisah dengan resolusi itu kerana ia tidak boleh menjejaskan negara tetapi merasa malu dengan tindakan sesetengah rakyatnya yang meminta negara lain mengecam negara sendiri.

"Ini sesuatu yang sewajarnya dianggap pengkhianatan. Tindakan pergi kepada orang lain (dan) meminta mereka mengecam negara sendiri dengan apa cara sekalipun, adalah perbuatan yang salah," katanya.

-- BERNAMA

AFY ZS NMO